



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

**Japan PM Takaichi-i election
Jelia agitsü sangdongogo**

**Novak Djokovic-i Australian
Open nung otsü tasen yanglutet**

VOL. XXIII ISSUE NO. 98 (ADOK 98) DIMAPUR RASEMNÜ (WEDNESDAY) AENJETI (JANUARY) 21, 2026 ₹ 5.00

CM Rio-i Khaozaosie Hok-Ah cum Mini Hornbill festival nung aden

Dimapur, January 20, 2026 (TYO): Noklak district kübok Nokhu nung January 20, 2026 nü Khaozaosie Hok-Ah cum Mini Hornbill festival 2026 mungogo. Iba sentong nung Chief Minister Dr. Neiphu Rio-i tongti tesemdang ka ama aden.

State sorkari Naga nunger sobaliba aser inyaksangshi takar wazüka ayutsü atema kintem benjung ajungketer, kechiyong benjungbentsü ajanga nübortem tsüngda medemer yimteper aser telongjem adoker ta Dr. Rio-i ashi.

Oboula nungeri kanga dang shisa kaa Naga sobaliba aser inyaksangshi kümzüka ayu aser lanu putu nem agütsü ta pai ashi.

India-i British nunger aruba sülen parnoki Naga nunger sobaliba aser inyaksangshi ajitet aser Bengal Eastern Frontier Regulation Act, 1873 yanglu. Iba ya North-Eastern region nung lisopurtem kümzüka ayutsü atema yangluba ozüing ka lir ta Dr. Rio-isa metetdaksü.

Iba Act ajanga Inner Line Permit (ILP) system inyaker aser Naga sobaliba aser inyaksangshi wazüka ayur, ta paisa shisem.

ENPO-i akhangba atema jembidang "State sorkari Eastern Nagaland nung Frontier Nagaland Territorial Authority (FNTA) tentettsü atema Centre nem tebilemba agütsüogo" ta Dr. Rio-i ashi.

Naga nunger tesem aser state balala nung alir ajak longjemtsü atema Pan Naga Hoho ka tentettsüla aser iba ajanga asen maitsü aser taginüba kümzüka ayutsü ta paisa ashi.

"Naga nunger rongnung yimjung aser telongjem nüngdaker aser MLA tem, civil society organizations aser arogo lennirtem külemi teka amteper asen lokti tejakleni aotsü atema

külemi inyaksüla" ta CM Rio-isa ayongzük.

Iba sentong nung CM Rio-i Noklak District Handloom & Handicrafts council, department aser Self-help Groups ajanga lapokba stalls lapoktsü.

"Angami aser Khiamniungan nunger tsüngda tesentaktep alemli nungi lir. APO-i Naga nunger ka dang ta asüba nung noktaker aser Naga nunger longjemtsü asoshi inyaksü tenangzükba lir" ta iba benjung nung Tribal Guest Angami Public Organization (APO) president Thejao Vihienuo-i ashi.

"Naga National Movement tenzükba ajanga Nagaland statehood mapa inyaktet. Naga loktiliba ya yirua aliba loktiliba ka lir aser iba ya asenok lia arudang tatalokba balala ajangshiba ajanga lir. Asenok tsüngda kati ka dak temulung lemteper nung dang taneptsü angutsü aser kin shia nung yimjung aser telongjem ali nung dang temulung lemteper tanaben shia arutsü" ta Vihienuo-isa ayongzük.

"Iba benjung ya odang amunger masü saka Angami o Khiamniungan kintem tsüngda dang masü saka tanga Naga kintem den tesentaktep yangluba ka lir. Angami aser Khiamniungan nunger longjemba ajanga asenoki tanga Naga kintem den-a tesentaktep akangshiteptsü tezüngzükteper agidi" ta APO president-isa benjungmunger ayongzük.

Iba sentong nung MLA Benei M Lamthiu-i benjung salem lemsataper aser Khiamniungan Tribal Council president L. Ngon-i tesentepertem pelaa agizük.

Chief Minister Dr. Neiphu Rio den Minister Metsübo Jamir, Minister C. L. John, MLA Achumbemo Kikon aser MLA P. Longon nunger aden.

NPSC züngsemtem tezüngzükteper agitsü

Dimapur, January 20, 2026 (TYO): Nagaland Chief Secretary-i Nagaland Public Service Commission nung Chairman aser Members tezüngzükteper agidaksütsü atema shimtetogo ta Personnel & Administrative Reforms Department, GoN-i metetdaksü.

January 23, 2026 anüngdang 12:00 ako nung Conference Hall, Nagaland Civil Secretariat, Kohima nung iba sentong agitsü. Anungji Administrative Heads of Departments ajak iba sentong nung adentsü metetdaksür ta P&AR Department-isa ashi.

Nagaland Governor-i December 22, 2025 nü taoba

NPSC züngsem A. Pitoho Chophy-i Chairman aser inyaksü shimtetba osang metetdakja liasü.

Kasa anogo nungsa NPSC züngsem tasen asem- Kenilo Apon, Athel O. Lotha, aser S. Temsuwati Angh nunger shimba tanga sangdong ka nung metetdaksü.

Pitoho Chophy-i küm 6 mesüra pa arishi küm 62 majung, koba tekaraba südir iba tashi NPSC Chairman inyaksü.

NPSC Members tasen asemjia küm 6 mesüra arishi küm 62, koba tekaraba südir iba tashi inyaksü ta P&AR Department-i metetdaksüogo.

Kohima Press Club küm 25 jungogo: PCI President aden



Kohima, January 20, 2026 (TYO): Chief Minister Neiphu Rio-i Mongulbarnü journalists dang ochi ashitsü, tangatetba tajung alitsü aser tebilemstü bena inyaksü ayongzük.

Kohima Press Club (KPC) küm 25 ajungba jubilee tembangba sentong nung CM Rio-i iba tayongzükba agi.

Nagaland nung journalism putiotsü bushira 1933 küm Naga Messenger ta ser Ao Milen tenzükba liasü aser iba ajanga akhidang yimtenren aser lokti tayongzükbatem liaka loktiliba nem osang sangoktsütsü merangba sayur ta CM Rio-i ashi.

"Nagaland nung industries maliba, advertising revenue balaka manguba aser sorkari teyari peria magütsütetba ajanga media organizations-i tetsükdaksü ajurur aser iba ajanga osangkaket aika anentsüsa kümogo. Item talenbatem liaka journalists-i kanga meranga aser bendanga agüja public tenzükba atema tenüngsang agütsür" ta paisa ashi.

"Kohima Press Club ya 2001 nung tenzük aser tanü tashitait reju ka kümogo aser fourth estate ama tongtipang shilem agir. KPC-i reporting dak alia media education, public dialogue, aser social welfare activities maparen inyakba atema tenüngsang agütsür" ta CM Rio-isa ashi.

KPC-i Kohima Press Club Impact Journalism Award aser KPC Nagaland Building and Reconstruction Workers' Welfare

Award tenzükba atema tetushi agütsür ta paisa shisem.

Northeast Media Conclave ya mapang shitak ka nung ayonga agir aser iba ajanga journalism tali akangshitsü. KPC-i maneni tasü itta aser tebilemba bena journalism mapa inyaksü imlar. Nagaland aser Northeast tali azükarutsü atema sorkar aser media tsüngda tesentaktep tajung ayutsüla ta CM Rio-isa metetdaksü.

"India nung corporate control, özüngtem aser senotsü nung tetsükdaksü ajanga media-i tetsükdaksü ajurur" ta Press Club of India (PCI) President Sangeeta Barooah Pisharoty-i ashi.

"Tesüiba küm metsü tsüngda Indian journalism jenjang kanga mejungi kümogo aser iba ya corporate-funded media ajanga public-interest journalism melenzükba ajanga lir. Press indang tongti tezüngzükteper public den agitsüla kechiyong asenok ya democracy nung tongshi pezübuba (fourth pillar) lir" ta lai ashi.

"Digital Personal Data Protection (DPDP) Act atema tebilemstü abener kechiyong journalistic exemptions agienba ajanga investigative reporting nung tetsükdaksü ajurutsü. Iba Act ajanga Right to Information menentsüogo" ta Pisharoty-isa shisem.

"Tanü India nung journalism aser public tesentaktep mali kümogo kechiyong media organizations aikati sensotem

asoshi masü saka yimtenren aser shishilembabaren tsütsü shir inyaker. Iba jagi peria meliaka independent digital platforms ajanga public-interest journalism inyaker" ta laisa metetdaksü.

"Sensotemi independent media nung shilem agitsüla aser subscriptions aser tenla terara ajanga teyari agüja nungitsüla. Tera dang tenlaba ajanga democracy kümzüka ayuba nung yariteptsü akok" ta PCI President, Pisharoty-isa ashi.

Lai The Wire nung inyakba indang olen ka lemsatetdang "reader-funded journalism ajanga editorial independence aser accountability agütsü" ta ashi.

PCI President ka ama lai journalists asoshi legal assistance cell ka tentettsü, technology aser digital security atema free workshops agitsü aser India nung press clubs indang federation ka tentettsü mapatem inyaksü ta Pisharoty-isa shisem.

PCI küm 68 putiotsü nung la ya tetsür President mezüngbuba lir aser Northeast nung journalism tsütsü tetsür tanishirtem aika adokba atema tenüngsang agütsür ta laisa ashi.

Iba sentong nung KPC President Alice Yhoshü-i January 2001 nungi club tenzükba aruba osang lemsatet. Tang KPC nung züngsem 66 lir.

Kohima Press Club küm 25 jubilee ya Capital Convention Centre, Kohima nung "Traversing 25 Years of Storytelling: Inspiring the Future" omen nung ajemdaker amung.

Head GB pur aoba ken o atema WSYF-i Sümi lanurtem renema alitsü tuyur

Dimapur, January 20, 2026 (TYO): January 19, 2026 nü NSCN/GPRN - Khango/Hokato Vusshe teloki Vikhuo village nung Head GB Kiyeto Zhimomi (Kits) pur aoba atema jashir aser aitsür ta Western Sümi Youth Front (WSYF)-i metetdaksüogo.

Kechi ken o atema südir süaka tashiyim, amokmeren aser pur aoba inyakyimtem atema temeten kecha mali. Iba inyakyim metentsü kecha mali aser civilian

dak tenük yoka inyakra Tezüluba ka agütsüba sülen Kiyeto Zhimomi (Kits) chiokogo saka iba inyakyim ajanga pa apuba mesüra pa pur aoertem mejenbur, kechiyong Sümi nungeri ibala inyakyim odangbo meyutsütsü ta WSYF-i metetdaksüogo.

Kiyeto Zhimomi (Kits) pur aoba aser chiokba dak sendakba maparen ajak bushisüngdangtsü aser ochi metettsü. Iba mapaji

metembang tashi Sümi lanur ajak kümdanga, renema aser longjemer atatsü tetuyuba agütsür ta WSYF-isa ashi.

Cease Fire Monitoring Board (CFMB)-ia shinga tsütsü tejak meshii aser memenui ceasefire ground rules inyaksüla. Iba nung tamakok ngura ceasefire maparen nung temulung malemstü aser yimjung maparen nung public-i tamang makatsü ta WSYF-isa ashi.

Assam Rifles-i Chungtia nung Watch Tower ka yanglutsü



Dimapur, Aenjeti/January 2 (TYO): Assam Rifles ajanga Mokokchung district kübok Chungtia yimdak Watch Tower ka semzüksü, koba Op Sadbhavna 2025-26 kübok yanglua liasü.

Chungtia village ya meta tezülen lir aser ki o jen peria mali aser iba project yagi tensa balala nung awareness agütsüba tali tajungba akumtsü aser nüburtem temulung nung

tetsübo makai alitsü, ta Assam Rifles sangdong ka ajanga ashi.

Chungtia yimtsüng ketdangsür temi mebishiba nung ajemdaker iba project ya inyaka liasü. Iba Watch Tower yagi security tashi itshiba, jungshitepba aser civilian aser mitkartem tesendaktep akangshiba nung tongti shilem agütsü imlar.

Iba Tower semzüksü sentong nung Nokchasashi,

Joint Commissioner; Asamwati, Chairman, Chungtia Village Council; Rev. M Laka Tzudir, Pastor, CBC, Veteran Officer Major Toshikaba (Retd), village council züngsemtem, yimtsü-yimbo aser Assam Rifles nungi teshimtet nisungtem dena liasü. Iba sentong ajanga sepaitem aser nüburtem tsungta tesendaktep tajung aliba aser tamang katepba sayur, ta sangdong ajanga ashi.

NPF-i Kohima Press Club nem tenüngsang agütsü

Dimapur, Aenjeti/January 20 (TYO): Kohima Press Club (KPC) küm 25 ajungba asoshi Naga People's Front (NPF)-i tenüngsang agüja liasü. Iba jubilee ya Nagaland nung osang abenba yimya nung bendanga agütsüba, press freedom aser osang shidak abenba nung alizüng ka tongtetba lir.

Liyonga arudang, Kohima Press Club ajanga media practitioners tem atema tongtipang sapang agütsü aser

ochi bushia nüburi jangraba ama inyakyim tashi itshia arur. Press ya Fourth Estate ama inyakyim shidak amshiba ya tejangja aser pela agizüker, ta ashi.

NPF-isa KPC nung züngsem mezüngpur nem akhum agütsür, shirnok asenok den mali. Parnoki tetenzükang shilem tajung agiba aser mangdang tajung ayuba ajanga tanü osangbener ajungmesor aser akum agüja bilemtetsü.

KPC iba alizüng benjongba

asoshi NPF-i KPC züngsemtem bendanga agütsür ochi nung pei mapa shidak inyakba asoshi tenüngsang agütsür. Technology kanga kera melenshia aoba mapang aser osang tiazü tali prokshiba mapang parnoki osang shidak abenba ya lokti asoshi kanga tongtipang lir.

Tarutsü nung Kohima Press Club maneni renloka aotsü aser takok alitsü moatsür, ta NPF sangdong ajangasa ashi.

Tsukian Lamheing nem Miss Khamniungan 2026 korang semtsüogo



Dimapur, Aenjeti/January 20 (TYO): Khamniungan Menyi Hoikam (Khamniungan Women Organization) ajanga EAC Headquarters Nokhu, Noklak nung January 19, 2026 nü Khaozasie - Hok-Ah cum Mini Hornbill festival 2026 mapang "Elegance Re-defined" omen kübok Miss Khamniungan 2026 tetoktepba ayongzüksüba nung arishi küm 22 tain Tsukian Lamheing-i iba takok korang ajangzüksü liasü.

Laisa Best Ethnic Modern Wear title angu aser senpet sen 30,000 den sempetlep bener ao.

Songmo Khamniungan-i First Runner-up aser Tainiu-i

Second Runner-up jenjang nguteta liasü.

Iba sentong nung akhumdong ka ama Er. Khaosha Lam, SDO, PHED, Longkhim aden. Lam-i sentong nung jembidang, chichiba tebour tajung ya akang-jungshitepba, angatetba aser bendanga agütsüba nung tera yanga lir, ta ashi.

Tebour ajungba ya tema tereprangtsü kisüng masü saka temulungjang nungi adoker ta ashi.

Miss Khamniungan takok korang anguri yimya tajung amshia, ola malir indang ola ama inyaka social awareness agütsütsü aser tetsür tem

ajungmesoa mapa tajung asoshi nokdaksü imlar, ta Er. Lam-i ashi.

Miss Khamniungan 2026 nung sub-title akokertem Miss Congeniality - P. Tainiu (Contestant No. 10), Miss Perfect 10 - Mucham (Contestant No. 8), Best Ramp Walk - Muchoi W. Lam (Contestant No. 3), Miss Photogenic - Longkoi Khamniungan (Contestant No. 6), aser Best Ethnic Modern Wear - Tsukian Lamheing (Contestant No. 11) liasü.

Iba sentong ya Miss Khamniungan First Runner-up 2023, Jime Shiu-i choreograph süa liasü.

Chümoukedima nung disaster mock drill alitsü

Dimapur, Aenjeti/January 20 (TYO): Chümoukedima nung January 29 & 30, 2026 anogotem Mock Disaster Managment Exercise alitsü, ta District Disaster Management Authority (DDMA), Chümoukedima sangdong ka nung ashi.

Lendong mapang renema aliba tali tashi itshitsü aser sendaktepa aliba department aser agencies tsungta tajungtiba nung amalitep akatsü atema iba sentong ya ayongzüker, ta Deputy Commissioner & Chairman, DDMA Chümoukedima, Polan John-i ashi.

Iba mock exercise takok ngua agitetsü atema police, medical, fire 7 emergency services, yimtsüng ketdangsürtem, lanur lokti tentet aser sendaktepa aliba

department ajunga dang amalitep akatsü aser nungdakba mera agütsü ayongzüker, ta ashi.

Iba mock exercise ya 12th Battalion, National Disaster Response Force (NDRF), Kohima den teka amteper ayongzüksü.

Lendong timtem mapang renema aliba, telangzüba agütsüba mechanisms aser department balala tsungta tesendaktep aliba asadangtsü asoshi iba exercise ya ayongzüker.

January 29, 2026 anügdang 11:00 ako nung Deputy Commissioner, Chümoukedima indang Conference Hall nung Tabletop Exercise alitsü. Iba sülen January 30, 2026 anügdang 11:00 ako nungi tenzüka Chümoukedima village ground nung Mock Exercise ya alitsü, ta sangdong ajanga ashi.

Mokokchung nung Gandhi Shilp Bazaar tenzüko



Dimapur, Aenjeti/January 20 (TYO): Additional Deputy Commissioner, Mokokchung, Atsüngba Walling-i January 20, 2026 nü Town Hall, Mokokchung nung Gandhi Shilp Bazaar semzüksüogo, koba Ministry of Textiles, Government of India ajanga sponsor süa liasü.

Walling-i nüburtem dang iba sentong semdanga local aser national artisanal community yaritsü aser sobaliba tajung ajangshitsü ayongzüksü liasü.

Iba osettsüset sayuba aser ayokba sentong ka January 20, 2026 nungi tenzüka anogo tenet

atema alitsü, kong nüburtemi iba bazaar ya anogoshi nikongdang 2:00 ako nungi aonung 8:00 ako tashi semdangtsü akok.

Linük tesem balala nungi teka mapa inyaker temi yanglutetba sayutsü asoshi sapang agütsütsü nükjidong nung ayongzüksüba lir.

Iba bazaar nungya handicrafts aser handloom oset tabu balala angutsü, kong Mokokchung nung aliba nüburtemi indang-indanga teyanglur ket nungi sobaliba dak sendakba osettsüset balala alitetsü.

Mokokchung DC ajanga Republic Day 2026 atema metetdaksür

Dimapur, Aenjeti/January 20 (TYO): Deputy Commissioner, Mokokchung, Ajit Kumar Verma, IAS ajanga Ungma, Mokokchung, Chuchuyimpang aser Khensa indang putu menden, Mokokchung Town indang GBs, Wards 18 nung ketdangsürtem aser Mokokchung Town nung aliba

nüburtem dang 77 buba Republic Day benjongmung sentong ya akhi ama January 26, 2026 anepdang 8:30 ako nungi tenzüka Imkongmeren Sports Complex, Mokokchung alitsü ta metetdaksü.

Deputy Commissioner-isa nisung ajak dang arua iba benjongmung nung shilem agütsü ayongzüksü liasü.

Home Department-i computer advance grant indang metetdaksü

Dimapur, Aenjeti/January 20 (TYO): Home department Loan Branch, Government of Nagaland ajanga State sorkar mapa inyaker ajunga dang FY 2025-2026 atema grant of personal computer advance

indang application form ya January 19, 2026 nungi tenzüka agütsütsü, ta metetdaksüogo.

Application ya February 13, 2026 tashi agizüksü aser iba sülen application kata magizüksü, ta sangdong ajanga ashi.

PM Modi-i BJP Tir tasenba Nitin nem tenüngsang agütsü



January 20, 2026 nü New Delhi nung aliba BJP headquarters nung Ato kilonser, Narendra Modi-i BJP National Tir tasenba, Nitin Nabin (tiyong) nem tenüngsang agütsü tangokba noksa nung angur. Kasa noksa nung Defence Minister Rajnath Singh-a angur.

New Delhi, Aenjeti/January 20 (Agencies): Mongolbarnü BJP headquarter, New Delhi nung Nitin Nabin-i BJP National Tir tenangzükba agiba sülen lokti den jembidang Ato kilonser Narendra Modi-i, 'Nitin Nabin ya kü boss' lir, ta ashi. Bihar nungi arrshi küm 45, Nitin Nabin-i BJP Tir JP Nadda melenzüker. Nitin-i Tir tenangzükba agiba sentong nung Ato kilonser Modi, home minister Amit Shah, Tir menden nungi anensang JP Nadda aser defence minister Rajnath Singh nunger aden. BJP headquarters nung Ato kilonser Modi-i party nung inyakertem ajak tenüng nung Nitin Nabin nem tenüngsang

agütsü. BJP ya alima nung yimtenren party tulutiba lir, ta pai ashi. "Nitin Nabin-i BJP tejakleni anitsü. Tanü lanurtem oshi nung shidi süra Nitin ya 'millennial' ka lir," ta Modi-i metetdaksü. Modi-i, "Taruba küm 25 ji kanga tongtibang asütsü. Iba mapang nungji terenlok India yangertsü, aser ibaji atangji ataloktsü. Tang ama tongtibang mapang ka tenzükba mapang nung Nitin Nabin-i BJP anitsü," ta ashi. "Nitin ya millennial ka lir. Pa ya India nung rongsenketzüng, sobaliba aser technology nung temelenshi tulu adokba kulisüa anguba putu ka nungi lir.


Lanuwa mapang radio ajanga osangtsüsang angashiba putu nung pa liasü aser tang Artificial Intelligence amshir ka lir. Nitin dak lanur tashi lir aser party organisation mapa nung pai aika ajangshia lir. Asen party nung inyaker ajak asoshi iba ya tajangzük tulu asütsü," ta Modi-i ashi. Ato kilonser Modi-isa BJP organisation sobaliba indang metetdaksüba den külemi BJP-i opposition party tem madak takok ngua aruba metetdaksü. Nitin Nabin BJP National Tir akümba atema Mongolbarnü par state Bihar yimtiba, Patna nunga lokti tulu adenshia benjungtepogo.

India tesem ajaklen Chikungunya wara bulur

New Delhi, January 20 (Agencies): India tesem ajaklen Chikungunya wara ajanga nisung meyrjang aika teloktep ngoa timtemba nung ajemdaker Indian Council of Medical Research (ICMR)-i antiviral treatment atema inyaksangshi tenzükogo. ICMR-i company tem dang RNA-based therapy yanglutsü ayongzükogo. World Health Organisation surveillance data ajanga ashiba agi, yaküm January nungi March ita tashi nung India nung Chikungunya agi shiranger südi ta bilemba case 30,000 dak tali liasü aser iba nungjagi nisung 1,800 dakbo iba wara aliba laboratory test ajanga jangja. Iba wara agi tamajungtiba kongshiba state temji

Maharashtra, Karnataka aser Tamil Nadu state tem liasü. Pune nung aliba ICMR indang National Institute of Virology (NIV) nung scientist temi iba wara treatment atema experimental RNA-interference-based therapy ka yangluogo. New Delhi nung aliba ILBS nung Clinical Virology nung professor Dr Ekta Gupta-i, "RNA interference ajanga viral protein formation nokdang. NIV indang RNAi ajanga Chikungunya nung E2 aser nsP1 nokdangtetba bushitetogo. Laboratory results ji junger, ajisüaka clinical trials nüngdaker, kechiyong tang tashi nungbo iba wara atema vaccine mesüra antiviral mali," ta metetdaksü.

Tesüiba mapangtem nunga India nung Chikungunya wara kanga pokteta liasü. Emerging Infectious Diseases-i sangdongba study ka ajanga ashiba agi, 2006 küm iba wara ajanga India nung nisung million 1.39 kongshia liasü. Scientific Reports (2025) ajanga ashiba agi, 2015 küm nungi tenzükba India tesem balala nung iba wara 480 ben pokteta liasü aser iba wara maneni proker. Iba wara atema nisung aikati 'pain relief' mozü achir, ajisüaka teloktep angoba/ashibabo ita aika mesüra küm aika maneper. Iba wara atema ICMR-i India nung company ka mesüra iba dak tali nem NIV-developed technology license agütsütsü.



January 20, 2026 nü New Delhi nung CISF sepaitemi Republic Day Parade atema renemshidang tangokba noksa nung angur.

METONGSHITSÜR

Tir Yimyim, Adok January 18, 2026 anogo nung "East Dimapur Aor Telongjem tenzükogo" ta adokba nung yamai melenshir. Ao Senso Telogjem Dimapur (ASTD) nungi temelaba ngur January 17, 2026 nü EDAT tentetogo ta asübaji yamai melenshir. 31st May 2025 nü ASTD lenla mongdang IMC Hall nung alidang "East Dimapur Aor Telogjem sapang ka tentetsü teloki mulonga agizüka ayu saka ASTD office nungibo temelaba agüja mali ta melenshir. Date: 20-01-2026 Sd/- Dr. Temsuwati For, Yim 7 Telongjem lenir East Dimapur Aor Telongjem, Nagaland

Ladakh nung SIR kübok lisopur masüba nisungtem züngoker

New Delhi, January 20 (Agencies): Ladakh nung tang tagidak Special Intensive Revision (SIR) kübok voters list nung lisopur masüba nisungtema züngoker, ta tashishitep ka adokogo. Buddhist nungertemi, voters list nung lisopur masüba nisungtem züngokba ajanga Muslim nunger vote aika akümtsü, ta metetdaksü. Ajisüaka election ketdangsertemibo, kibok shia sema aoba sülen ang electoral roll tasenbaji taoba mapang voter lists den medemdanga yanglutsü, ta metetdaksü. Election Commission-i, voters list nung züngoktsü atema Aadhaar den sorkari agütsüba identity cards densema document aika nüngdaksü, ta metetdaksüogo. Ketdangsertemisa, Ladakh Union Territory nung SIR ji linük tesem balala nung agiba ama kasa dang agitsü, ta metetdaksü. Ladakh nung Chief Electoral Officer, Rahul Sharma-i, EC telatetbatem nung ajemdaker kibok ajak sema SIR exercise agitsü, ta metetdaksü. Buddhist teloktemi, SIR inyakyim kübok lisopur masüba nisungtem aika züngokra region nung Muslim nunger votes aika akümtsü, ta metetdaksü. Ladakh nung Buddhist nungertemi, Muslim nunger nütsüng teimba arener, anungji SIR mapatong kübok parnok vote aika akümtsü, ta ashir. Ladakh nungi MP, Haji Haneefa-i, voters list nung züngoktsü atema tajemdakdakji domicile certificates asütsüla, ibaji ajanga lisopur masüba nisungtem mezüngoktsü, ta ashi.



Kulgam, January 20, 2026: Republic Day atongtsü anogo ishika dang lia Jammu & Kashmir kübok Kulgam district nung aliba Jammu-Srinagar National Highway nung sepaitemi gari mita reprangba noksa nung angur.

Kashmiri Pandits-i joko Kashmir-i marutsüa akok: Farooq Abdullah

New Delhi, January 20 (Agencies): Jammu nung osangbenertem den jembidang taoba mapang Jammu & Kashmir nung Chief Minister inyaksang, Farooq-i, "Kü mapang nung ni parnok (Pandits) dang, onoki nenok nem ki sütsütsü aser teyari balala agütsütsü ta ashi, ajisüaka kü sorkar tembangadok. Anungji Centre sorkari parnok atema inyaktsütsüla," ta metetdaksü. Farooq-isa, "Parnok tesem ajaklen alir. Parnok tain kümogo aser yangi anepalur. Par chirnurtem colleges, schools aser universities nung azünger. Parnok tesemdangertem ama dang arur. Parnoki teti alitsü atemabo yagi meyipa marutsüa akok, ta ni bilemer," ta ashi. Paisa, parnok Kashmir-i meyipa arutsü atema shingai menokdang, ta ashi.



TIR YIMYIM YIMOBILEM (EDITRIAL)

DIMAPUR WEDNESDAY, JANUARY (AENJETI) 21, 2026

Nepal nung lanur putu

Yaküm Nepal lima nung lanurtemi yimten yimsüsürtem pei menden nunga mena meliteti ajentsüsa ochimashiba maparen nung anema apusoba sülen, tang ita pungo sülen Nepal yimten kümtetshitsü asoshi taküm 2026 küm March 5 nü General election agitsü asoshi anogo lateta lir. Aji oda, tang Nepal lima agitsüba election yabo lanurtem o tamburtem na tsüngda yimten tashi raktepba mapa ka amai asütsü. Nepal lima ya küm aika chubai dang yimsüsüa aru, saka kodang 2008 küm chuba yimli agiener nübortemi dang yimsüsür shimba Democratic yimten agi melen, iba nung jagi nübortemi election ajanga shimtetba yimsüsürtemi par lima aser nübortem ajungtsü atema kisüng bilema inyaksü melen, Nepal lima dangbo par nija li temeimba aküm aser Nepal nungertem dang nungibo par kibong aser kinungertemang temeimba aküm. Iba jagi Nepali nunger pei lima nung ayangtsüa mapa maka aser chiyongtsüa maka timtem marem bendanglen sükshia ayangtsü tenzük. Temeimtsü kaji, Nepali nunger pei kibong mesütsü asoshi tangar bendanger kin o kin na tongpang rara nung dena sepai kümer ayangertem liasü. Aji oda, Nepali nunger nübortem teimbaka pei chirnurtem kaketshidakia meyoktet timatemer saka Nepali nunger yimsüsür aser tulur chirnurtem temang ajunga hon agi zükbanga sübor aser yimsüsür aser tulur chirnurtemi azükba yangku aser anütetsü jenjangji yim ka küm piyong chiyong shia aser item tanurtem mener jajaba gari jenjangji Nepali nunger tanurtem ajak meyong school fee agütsüteta liasü. Atangji, mapa inyaker anüng tonga tua mejungketa akabaji jangratemtsüka aser tenükshitsüka saka yimten tashi amshia nübortem meyong rongsen agi pei meyong rongsen kümer, pei nübortem timtembabo tenük agia mangu ngasangatema akabajibo tejashitsüka aser temulung ashitsüka lir, item rongsentemjibo temoatsü masü saka lendong aketba osettem pei kidang bendena ayuba amai lir. Iba ama tim masüba rongsen bendena yimsüsür aser tulur chirnurtem ngasangatema jaksajaklemba agi Napal nunger sensaker chirnur aser lanurtem temulung yirur, item ochimashiba yimsüsürtemi ajungdoktsü asoshi apusoba takutsüngdok mapang ka Nepal lima nung yaküm atalokba asenoki nguogo. Iba mapang kidanga meliteti army tayimtsü nung jena aosang, taoba Nepal ato kilonser (prime minister) arishi küm 74 tain K.P.Sharma Oli ano tanaben meyipa aruagi aruya aliba March 5 election nung pa taoba mapang trokben tashi adoka aruba Jhapa-5 constituency nung aitsü asoshi par telok Communist Party of Nepal (Unified Marxist & Leninist)-i shimtetogo aser paji par telok asoshi prime ministerial candidate lir. Ajisüaka, arishi küm 74 tain yimsüsür Oli anemaji lanur küm 50 teküpbok anati tokteptsü asoshi tenüng agüja lir. Kaji, arishi küm 49 tain Gagan Thapa, Nepali Congress telok nungi lir. Nepali Congress telok ya Nepal nung tejentiba yimten telok ka lir aser yaküm tashi iba telok nungi taoba Nepal ato kilonser Sher Bahadur Deuba lenir ser arua liasü, saka lanurtemi Deuba-ji yutsür Thapa shimtetba agi, Nepal nung lanurtemi aginüba ama temelenshi arutsü teimla tulu lir. Taoba küm Nepal nung yimten yimsüsürtem anema nokdakertem ya Gen Z putu lanurtem liasü aser parnoki Thapa ama lanurtem tebilemstü aser taginüba angatetba lenir aginür. Atangji, India ama Nepal yimten nunga yimten telok aika alinungji, ano Nepali nunger Gen Z lanurtemi sapuba lanur lenir ka lir, pajibo arishi küm 35 tain dang aser Structural Engineer aser ken tena tsüngsanger rapper Balendra Shah lir. Pa ya 2022 küm Kathmandu yimti nung Mayor asütsü shimtetba lanur ka lir. Pa ya tang Nepal nung yimten telok tasenba Rastriya Swotantara Party nungi election nung tokteptsü aser adokra prime minister südaktsütsü par telok telemtetba lir. Balendra yagi pa dang nungi arishi küm nung anasüshi agia tambu Oli den kasa Jhapa constituency nungi tokteptsü renema lir. Atangji, Nepali nunger lanurtem rongnung Thapa aser Balendra na den ano lanurtemi aginüba lanur lenirtem jenti tan Nepal election nung tokteptsü renema lir. Ibaji kodang bilemdangdir, Nepal nung taruba march nung agitsüba election yagi government dang masü saka Nepal lima yimsüsüba putu dena melentsü amai sayur.

OLEMSABANG

"SHI AKADANG ANGO AKA AMAI"

- Watimeren

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Oda, temeimtsüka merenba ba tetsü den la shirang yipden nung alidangasüng majuruteptet tetsü mang ali nung remer sülen ang bar ki atong. Ano ajidang masü ano tebo tua anoba shirangbatu tama-Jungba ang Kümadok. Asünungji merenba tu ano tebo shirangbatu anepalutsüsa aküm. Oda, "shi aka dang ang" ta ashi ama ano ita anogo kobi meli-i tebo tua iba akümlir lima toktsür aotsüsa mapang agi bener arutsü. Iba sülenji merenbatu ba alidak tedi-er kidang tuagi maoneseta apusutsüsa aküm. aji oda, yamaji Küm ishika liyonga or külen, jokola ba-a kibong akümstü mapang atongnungji, tedi-i kangadang mera keta tenu merenbaji kibong Kümstü. Oda, yamaji Küm ishika liyonga arudang ano tedi Toshiba tua oda parnok süpai taküm ka asüyongji ano tia makai tsükchir injang agi kongshia doctortemia mekumzükteti ba-a iba lima nung arishi tembang. Jokola oda, bar amala tua alimar yimya asünungji la-a amia alitsüsa tensa mapang agi bener arutsünungji, tebo tanubo merenbai tedi-er jabaso tu bar kidangi bai mesütsü anir aru. Aji oda, ba kinüngtsü shisa Jaka, taremzükdén ano ajidang masü oda kangadang Tsüngrem metetba aser tamangtir tetsü ka asünungji la-i iba jabasojia kangadang temeimnung oda pe-i tetsü tasola amaidang meima aniteta-mesüa aru. Aji oda, mapang kobi meli-i ano bar apuani nema Tsüngremer temeim taoji ajanga jabaso ka aser jala ka ta moatsü. Oda, yamaji liyonga ligo aodang la-i Jala-Jabaso bar asemji oda chiyungtsü nunge tenzüker aben-Suoshi amala mesüra ano oda kibong kanung chirnurtem nüngdakba kechi sarina ajak nung oda kecha tebandang meli-i parnokji anepalua-mesüa aru. Aji-oda, bar kibongji tenati Tsüngrem dang sara sadema dang tena kibong mesütsü asoshi sentongtem yangluba aser acha-ayangba ajak nung oda asen teyanglur Tsungremsa tajungba asünungji tena kibongji kangadang temoatsü nung lia aru. Aji oda, liyonga arudang ano bar amala tu alimar tashitak kar agi menep. Oda, amitsür ang ka asünungji kangadang timtem aser mokokmein tia ka nung liasü, Koda masünunji ano merenba-o-ba kinungtsü tenati-ang anepalutsüsa kümadok. Aji oda, tena kibong khuret den ano bar tamo shirangba anepalutsüji kangadang khuretsa ajangshia liasü. oda, Tsüngremer sentongji aseni memetetnungji amala shirangji taneptsü müngui ano tamajungba-ang kuma teimla makai kümadok. Künü anogo anüpong mapang kanung amolai la shirang yipden nungi merenba jar ba dang yamai shia liasü. tebo-tanubo meren nü lanuwa ni nüdang kangadang maketmeseni na kangadang jashidakja temulung shirangadang lidaktsüogo. Anungji, nai Tsüngremer tenüng nung yimlibilema Kü-nem tai tokangma ta shia liasü. Aji oda, yamaji lir anogo ishika sülen la arishi tembang.

Anungji asenok ajaki iba lima nung tatsüka alidang asenoki pei sünütsüsüa pei mulungba nungdang libaliroa meli-i kati-ka den temeimtep, tesendaktep aser amalitep ka-a alitsübaji kangadang nüngdaker. Aji oda, iba nungjidang asen teyanglur Tsüngremjia atener aser bai asenok kija takum shianem pei yari moatsür. Anungji iba otsü tilaka ajanga asenok ajak taküm nung temelenshi aser tajangzük kar danga ngudisü tateimla nung Kü otsü tembanger.

(Maneni asüng nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pope Leo-i Czech Republic semdangtsü: Tir Petr Pavel



January 19, 2026 nü Vatican nung Pope Leo-i Czech Republic Tir, Petr Pavel agizükdang tangokba noksa nung angur.

January 20, 2026: Pope Leo XIV-i Czech Republic semdangtsü melungogo, ta Hombarnü Czech Republic Tir, Petr Pavel-i metetdaksü.

Petr Pavel-i X ajanga, "Eva (pa kinüngtsü) künati jaokba ama Pope-i Czech Republic semdangtsü melungba atema pelar. Kobi melii asenoki pa yangi agizüktettsü amanger," ta metetdaksü.

"Arogoi tongtimbang shilem agir aser rara anentsü atema lenmang bushiba nunga Arogoi tongti shilem agir. Tanü putu

nung ken o jembiba ajanga Europe tarutsü jenjang lateter, aser ibaji kanga tongtimbang. Democratic linüktemi alima nung security aser yimjung atema inyaktsüla, ta Pope künati bangjemogo," ta Tirisa metetdaksü.

Pope den senden amenba sülen Pavl-i Cardinal Pietro Parolin (Secretary of State of His Holiness) aser Archbishop Paul Richard Gallagher (Secretary, Relations with States & International Organizations) nata ajurua

liasü. Vatican aser Czech Republic nati tesendaktep tashi itshitsü atema bangjemogo, iba denji külemi regional aser onüktem nunga o lemtepa liasü.

Czech Republic ya central Europe nung aliba linük ka lir aser iba linük nung nütsüng million 10.8 nungi nütsüng shilem 34 dang Khristantem lir.

Iba linük nung nütsüng shilem 59-ibo Tsüngrem ali asü maliar mejangja aser nütsüng shilem 9 bo Tsüngrem dak mamangertem lir.

Odisha nung pastor ka nem kangshia nashi scü chidaksü

January 20, 2026: India tesem balala nung Khristantem anema inyakba kanga bulua akümba mapang nung Odisha state kübok Dhenkanal district nung Hindutva telok kati pastor ka dak azük, kangshia 'Jai Sree Ram' ta shidaktsütsü merang aser nashi scü chidaksü.

January 4 (Amongnü) Pastor Bipin Bihari Naik aser pa kinüngtsü na den nisung kar Parjang yimdak adenshia sarasademba mapang Bajrang Dal telok nungi nisung 40 shi aru.

Naik kinüngtsü Vandana-i, lokti jagi pastor dang kimai ayazüka alung ta ashi, ajisüaka pastor-i sarasadem sentong tembangba sülen ang kimai alutsü ta ashi, ta metetdaksü.

"Ajisüaka lokti jagi tashiyim amshia ki telungi atuba sülen ajak dak azük. Kibong tenet nungi züngsemtem den onoki sarasadema liasü. Kü den ozü chirnurtem kimai jena aluba sülen anasatiba police station-i ao," ta lai metetdaksü.

Lokti jagi Bipin ta ser nisung ka kimai atsüzükba sülen pa dak kanga mejungi azük. Iba sülen pa tenütsü nung 'sindoor temerem' teptsü aser tsüngsem agi yangluba azük azüktsü.

Bajrang Dal züngsemtem aser yimdaklir temi pastor Naik-a kimai atsüzük aser ghonda ana shi yimdong süa anir jaja.

Iba mapang nungji pastor kinüngtsü Vandana bo police tonger liasü. Lai police dang la kinüngbu kümzükang ta mepishi, ajisüaka ghonda ana lir sülen ang police tonga aru.

Laisa, "Kü kinüngbuji yimdak Hanuman tekülem ki ka kima alena ayu. Pa nem kangshia nashi scü chidaksü aser pa dak azü yima liasü. Lokti jagi pa dak maokja kangshia 'Jai Sree Ram' ta shidaktsütsü meranga liasü," ta metetdaksü.

Police tonga aruaka lokti jagi maneni pa dak azük. Tesüsa Naik kümzüka police station-i anir ao, ta lai metetdaksü.

Khristan temeden atema inyaker Maktoob-i, "Naik ji ghonda ka shi police station nung mendaktsü saka pa nem medical teyari magütsü. Ni police station atongba mapang nung pa ajem-ajema mena liasü. Pa tsüngsa liasü aser tejak nung 'sindoor' tepa liasü," ta ashi.

Pastor Naik-i tangartem

Khristan yimsü dangi meyipdaksütsü merang, ta pa nem tai tongloktsüba sülen Bajrang Dal teloki pa anema inyak.

Parjang yim ya Hindu nunger teimba aliba yim ka lir. Iba yimdak Khristan kibong tenet dang lir. Pastor Naik-i mapang shia iba yim semdanga Khristantem ayongdener tekülem agia arur, ajisüaka pa anema inyakba yabo tang mezüng ataloker.

Vandana-i, "Onok kanga aoksaogo. Iba tatalokba sülen nungi Naik amoi mouteter. Pa tang mozü techidak aser tang tera tajungba kümogo. Pa yiruba zübobbo anepogo," ta ashi.

Lokti jagisa pastor Naik'er ki rongdoktsütsü, ta amokmerena liasü.

"Yamaji atalokaka kü kinüngbui parnoki ashibaji manga. Pa ajanga ni nüma atanger. Parnoki pa reshikangshiaka pai 'Jai Sree Ram' ta mashi," ta laisa metetdaksü.

Tang pastor Naik'er kibongji Khristan ka kidang jenoka lir aser Parjang yimdak Khristan kibong tenetji tesem balala nung kinüngertem kidang jenoka lir.

ANOGO ABEN TSÜNGREM DEN

Tenüngsang

Aser kodang parnok rongnung kati pa anepba angu, pai meyipa ola tulu agi Tsüngrem tenüng asang aser pai tetsüng nung aputaka Pa nem tenüngsang; aser Paji Samaria nunger liasü. Luke 17:15-16.

Tenüngsangji Khristan taküm kimong lir. Tenüngsangji temoatsü arulen repranga meteta agizükba lir. Khristan ka ama asenok dang tai atok, tasü nungi kümzük, aser Tsüngrem chirtem ama mesütet. Tenüng asangba mulungjang asoshi iba dang tajungba kuli malitsü!

Yisu mapang nung chitemra aketer telok nungi jentoka liasü. Iba tia nung parnok temeimbatem den pilaa ali. Kodang chitemra aketer teri Yisu ajuru, parnoki Pa dang parnok dang aochiang ta kanga mepishi. Yisui parnok putir dangi yok. Parnoki tashi angaba ama, parnoki aneb! Item chitemra aketer terji parnok yimdaki marudaktsü, parnok kidang melidaktsüi, parnok mapa meinyakdaksü mesüra parnok tanurtem daka mekongshidaktsü. Parnok kidangi meyipa aodang koda ka pelar alitsü, bilemdangang!

Parnok rongnung ka, Samaria nunger, anener, meyipa asema orr Yisu nem tenüngsang agütsü. Yihuda nungeri Samaria nungerji sempa saka Yisui pa anebtsü! Yisui pa dang asüngdang, "Tangartem to kong lir?" Chitemra aketer ter aneb. Chitemra aketer ter parnok temeimbatem osangtajung lemsateptsü pelashishia kidangi ao. Saka kati dang temoatsü arudak shisadang aser anener, asema orr tenüngsang agütsü, shibai pa taküm meyipa agütsü pa külem.

Asenoka Kümtetdakba ajanga aneptsü. Kümtetdakbai aochia agütsüba taküm pelaa alitsü asenok nüji lir. Chitemra aketer telok amaji, Kümtetdakba nem anener tenüngsang magütsüi asenok temoatsü nung pelateptsü aritepa aor asü ?

Tsüngremi asenoki tenüng asangba repranger. Asenok tekülem, sarasadem, tenzükbba aser anogo shia taküm Tsüngrem tenüng asangba dena alitsüla.

Nigeria nung Tenla ki ana nungi Khristan 160 puer ao

Abuja (Nigeria), January 20 (Agencies): Nigeria nung prangpong amer telok kati Tenla ki ana nungi Khristan 160 dak tali puer ogo, ta Hombarnü ketdangser kati metetdaksü.

Amongnü (January 18) Kaduna state kübok Kurmin Wali nung prangpong amertemi Tenla ki ana mita ao.

Prangpong amertem jagi Cherubim & Seraphim indang Evangelical Church Winning All (ECWA) Arogo Tenla ki aser Catholic Tenla ki ka mita ao, ta state parliament nung züngsem, Usman Danlami Stingo-i metetdaksü.

"Yashi tashi nung nisung 177 samar liasü, ajisüaka parnok 11 bo meyipa aruogo. Tanüngba 168 ji kong aliar memetet," ta pai metetdaksü.

Christian Association of Nigeria (CAN) nung tongti, Rev. Joseph Hayab-i, "Amongnü Tenla ki Sorkar aiya paisa, "Nigeria amakertemji auer teloktem lir. Tamangertem tekülem sentong tagidak mapang parnok aika arua timtem agütsü," ta metetdaksü.

International Christian

Concern (ICC) Tir, Shawn Wright-i US aser Nigeria nung lenirtem dang Khristantem kümzüksü atema tiyongtsü ia inyakdaksüner, ta metetdaksü.

"Nigeria nung tamanger 160 dak tali puer aoba osang angashia jashir. Iba ya tai maket nisungtem dak taochi makai inyakba lir. Parnok kümzüksü atema sarasademjang aser parnok kibongtem nem tesünep agüjang ta sarasademjang," ta pai mepishia metetdaksü.

People's Democratic Party Head Office nung national publicity secretary, Ini Ememobong-i, "Mapang shia tekülem kidang tamangertem amakba ya ajanga iba sorkari linük temzüng nung aliba yimsü temeden kümzüksü atema meinyaktetba sayur," ta metetdaksü.

Sorkar aiya paisa, "Nigeria nunger ajaki kecha tetsübu makai Tenla kitem aser mosque-i otettsüla. Iba sorkar yimsüsüba kübok ozüng alema inyakba mapatem kanga bulua ataloker," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tuko

(adj) züngdangba ti nung ka bendenlokba (nine)

* Ozü kibong nung tanur tuko liasü.

Tukor

(adj) züngdangba noklang ajungtsü ter agi mabensa (ninety)

* Ni sen tukor agi amtsük pongdang ka ali.

OLONG PAITEP # 7390

	1				2	3			
4			5						6
						7			
	8								
	9			10			11		
						12			13
14									
						15			

TIPIEN

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

-

(4)

-

(5)

-

(5)

-

(9)

-

(4)

-

(5)

-

(5)

-

(4)

LANGTSÜNGLEN

1. _____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. _____ kibur
13. Tebur tembar tsüngda jatepba

-

(4)

-

(6)

-

(5)

-

(5)

-

(6)

-

(5)

-

(4)

OLONG PAITEP # 7389 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER

Malayalam actor aser comedian Johnson George-i 'Aaranu Njan' nung shilem agiba ajanga putiotsü tasen ka yangluteta liasü. Iba film nung pai characters balala 45 tashi jilu ia sayu aser iba ajanga Guinness Book of World Records nung zülüok. Guinness World Records-i September 12, 2018 nü Kerala nung iba kuli ya jangjateta agütsü. 'Aaranu Njan' film nung Johnson George-i Gandhi, Yisu aser Leonardo da Vinci amala putiotsü nung nisung balala indang jilutem ia liasü.

CM Conrad-i Khasi senmang indang nüngshilung sayatsü

Shillong, January 20, 2026 (Agencies): Meghalaya Chief Minister Conrad K Sangma-i January 19, 2026 nü Mawlai Mawiong Rim nung Khasi mural ka sayatsüogo.

Seng Samla Mawlai Pyllun ta ser lanur telok kati lisopur sobaliba wazüka ayutsü aser lanurtem anitetsü atema küm 20 tashi aruba nüngtem nung iba nüngshilung yanglu.

Iba nüngshilung ajanga Khasi senmang,

inyaksangshi aser sobaliba maitsütem sayur.

"Seng Samla Mawlai Pyllun-i küm metsü tashi lokti tenzüka mapa inyaka aruba atema tenüsang agütsü. Nenoki maneni state renlokba nung lanurtem tashi anidena inyaktü imlar" ta CM Conrad-i ashi.

Chief Minister Conrad-isa Upper Lachumiere, Shillong nung Rev Dr Robert R Cunville'er kidangi oa tetushi agütsüogo.

Rev Dr Cunville-i küm aika Northeast aser tangalen Khristan tesayuba prokshia liasü aser Billy Graham Ministries den sendaktepa inyakba atema pa ya ajaki metetba sayutsünger ka liasü.

Rev Dr Cunville ya tamangdir ka, ajemalu aser bendanga agütsüba nisung ka liasü aser pai nisung aika tamangakangshidaktsüogo. Par kibong den asükhu lemsateper ta Conrad-i ashi.

Tripura Bhavan tasen asem yanglutsü: CM Manik Saha

Agartala, January 20, 2026 (Agencies): Delhi, Mumbai, aser Telangana nung Tripura nunger yaritsü atema state sorkari Tripura Bhavan tasen asem yanglutsü ta Chief Minister Dr. Manik Saha-i ashi.

New Delhi kübok Bir Tikendrajit Marg nung Tripura Bhavan ulushitsü atema lung azünga yutsüdang CM Saha-i iba osang metetdaksü.

Iba extension project ya Rs 2.95 crore endoka yanglutsü aser takdang tasen trok aser hall rooms ana süloktü.

"Testüba mapang Tripura nungeri Delhi semdangdang timtem ajurua liasü. Ni school aser college azünga mapang Delhi nung tanenzükdak angutsüba kanga tasak liasü" ta Dr. Saha-i ashi.

Tripura nungeri Delhi-i education, medical treatment aser official work atema aoer aser tang aliba ki yagi mepirir. Anungji sorkari akokba tashi ki ulushitsü atema inyaker ta pai ashi.

Tripura Bhavan ya mezüng 1981 küm Kautilya Marg nung yanglua liasü aser iba sülen 2002 nung Tikendrajit Marg nung

extension asü. Tang Bhavan nung takdang 24 aser large hall ka lir ta CM Saha-isa metetdaksü.

Dwarka Tripura Bhavan ya 3,000-square-metre kimung nung yanglutsü aser modern infrastructure aliba takdang 60 alitsü.

Mumbai nung Bhavan tasenbaji Tripura nung shirangertem aser parnok yaritepertem anenzüktsü asoshi major hospitals anasa yanglutsü. Külén, Telangana nung Tripura Bhavan yanglutsü atema kimung agütsüogo ta CM Saha-isa ashi.

55 Buba AOLI OZÜKÜM MUNGDAK**Nükmen: Jenjangyongshi**

Tesentepdak: Mongsenyimti
Anogo: January 22-23, 2026

Mungdang Akümdong
Wb. TONGPANG OZÜKÜM
Advisor, Department of Water Resources
Government of Nagaland

SENTONG TARENSEN**Sentong Ka**

JANUARY 22, MAPANG: 5: 00 AKO

Mungdang lapok : Mongsenyimti Ozüküm

- Sentong Lenir : Wb. Aosünap Ozüküm
Sarasademtsü : Wb. Panger Ozüküm
Tir ola : Tir, AOM
Pela-a agizükba : Wb. Aosüngit Ozüküm
Council Chairman, Mongsenyimti Village
Nguyutep mapang : Wb. Bendangtoshi Ozüküm
Tatong Tir, AOM
Nükrangdong : Sharoti Ozüküm
Molungnet O : Wb. Aowati Ozüküm
Tatong Tir, Ao Senden
Sangni : 1. Wb. Khumpise Mongzar
Longkhim Chare Mongzarü Union
2. Wb. Imliaküm Sanglir SDO(C)
Aoli Ozüküm Naklo : Mokokchung Town Aoli Ozüküm
Mungdang Akümdong O : Wb. Tongpang Ozüküm
Advisor, Department of Water Resources Govt. of Nagaland
Sobaliba ken : Dimapur Aoli Ozüküm
Tatem Sarasadem : Wb. Imsüwati Ozüküm
Asso. Pastor Chumukedima

Sentong Ana

JANUARY 23, MAPANG: 10:00 AKO

- Sentong Lenir : Wb. Bendangtemsü Ozüküm
Sarasademtsü : Wb. Linükyanger Pastor
Mongsenyimti Baptist Arogo
Ilangtsür Ken : Ozükümtsür Telungjem
Mongsenyimti
Satok O : Wb. Marlemba Ozüküm
Metokdangba Angsü : Wt. Tiajungla Ozüküm
Onok Moajang : Wb. Rev. Dr. Temjen Ozüküm
Shisamolü
Onir : Dr. Butesen Ozüküm
Shisalemsar
Guru. S Pangyang Ozüküm
Wb. Sentilong Ozüküm SDO(C)
Sobaliba Ken : Waromung Ozüküm
Tatem Sarasadem : Wb. Lanujongma Ozüküm

Sentong Asem

JANUARY 23, MAPANG: 2:00 AKO

- Sentong Lenir : Ketdangpurtem
Sarasademtsü : Wb. Rev. Dr. T. Lima Ozüküm
Mongsenyimti Senso Missionary
Medem O : Wb. P. Chuba Ozüküm
Convenor, Global Naga Forum
Moajang : Kr. T. Sentiyala Ozüküm
Osangtem agitsü : i. General osang
ii. Audit Luden osang
iii. Permanent Source of Income
iv. Research Committee Osang
v. Nüngtet Luden Osang
O Lemtep Mapang
Sobaliba Ken : Mopungchuket Ozüküm
Melepzung O : i. Lim Sentongtonger Luden
ii. AOM Sentongtonger Luden
Menden Atsüngtepba : Tayonger, Nüngtet Luden
Tatem sarasadem : Telok

- Tir : Wb. Watisütsüng Ozüküm
Tatong Tir : Wb. Bendangtoshi Ozüküm
Tongti Zülur : Wb. Longka Ozüküm
Repsem Zülur : Wb. Supongramok Ozüküm
Senotsü Zülur : Wb. Imkongkümzük Ozüküm
Kimen : Wb. Masachuba Ozüküm

OFFICE OF THE

AO STUDENTS' CONFERENCE (AKM)

H.Q. Mokokchung - 798601 : Nagaland

Regd. No. Rs. 3072

"For the Nation"

PELABA SANGDONGER

Ao Kaketshir Mungdang (AKM) 70 buba Inti senden Chungtia yimti nung Januray 13 nungi 15, 2026 tashi amungba sentong takok ngua mungtettsüsa teyari agütsüba aser shilem tajung agiba asoshi item tongtöbang nisungtem ajak dang AKM-i kanga pelaba sangdonger :

1. Dr. Neiphiu Rio, Hon'ble Chief Minister, Government of Nagaland.

2. Wb. S. Supongmeren Jamir, Hon'ble MP, Lok Sabha, Govt. of India

3. Wb. Sharingain Longkumer, Hon'ble Speaker, Nagaland Legislative Assembly.

4. Wb. Metsübu Jamir, Hon'ble Minister, RD & SIRD. Govt. of Nagaland.

5. Wb. T. N. Mannen,IAS (Rtd.) Hon'ble Advisor & MLA, Law & Justice, Land Revenue, Govt. of Nagaland.

6. Wb. Temjenmenba, Hon'ble MLA & Advisor, Transport & Technical Education, Govt. of Nagaland.

7. Wb. Tongpang Ozükum, Hon'ble MLA & Advisor, Water Resources, Govt. of Nagaland.

8. Wb. Achumbemo Kikon, Hon'ble MLA & Secretary General, NPF.

9. Wt. M. Imkongla Jamir, IAS, Resident Commissioner, Govt. of Karnataka, New Delhi.

10. Wb. Limasunep, IPS, Special Secretary, Home Govt. of Nagaland & Tir, Ao Officers' Telungjem .

11. DC & SP.Mokokchung.

12. Rev. Dr. Wati Aier, Convenor, FNR.

13. Wb. K. Temjen Jamir, Editor, Tir Yimyim.

14. Er. Lanuwabang, Director, NIELIT, Kohima, Govt. of India.

15. Kr. Imkongnükla Ao, EAC, Longleng.

16. AKM Planning Committee & Sub-Committees.

17. Local Planning Committee & Sub-Committees.

18. Programme Participants.

19. AKM Seniors.

20. Comperes & Recorders.

21. Delegates from different Ranges and Units.

22. Invitees and well-wishers.

23. NSF, ENSF & CNSA.

24. AO Senden aser Watsü Mungdang.

25. Mokokchung Press Club.

AKM inti mungdang kanga takok tulu nung mungtettsüsa anibelem mesasai tenla tulu agüja aniba asoshi Chungtia Village Council, Chungtia Students' Union aser Chungtia sensosanger ajak dang Ao Kaketshir Mungdangi kanga pelaba metetdaksür aser nenok ajak nem tenüngsang agütsür. AKM 70 buba inti mungdang nung arua adenertem ajak mulungjang nung teti mamai alitsüsa nenoki kanga junga anepaluogo.

Tsüngremi Chungtia nübortem talubosa Moajangma !

LANUTOSHI AIER
PRESIDENT, AKM.

SATEMMONGBA
GENERAL SECRETARY, AKM.

ALI TAYOKTSÜ LIR

Old Showuba, four lane anasa (Kimong asem) Sq.ft. @200/- @160/-
Kimong ajak nung jenjang terabo ajemtsü
Tongteprateptsü: 9863826159

Kimong ka @7 lakhs.

Trump-i Putin dang Gaza 'board of peace' nung adentsü ashi

Moscow, Aenjeti/January 20 (Agencies): United States Tir Donald Trump indang "board of peace" nung adentsü atema Russia Tir Vladimir Putin dang ashi, koba alima nung rara balala angatetteptsü aser Gaza nung ketdangsüba aser yanglushiba maparen achayangtsü nükkjidong nung lir.

Russia ya küm pezü jungnüa Ukraine den maneni rara yimjung tezüngzüktep meyangluteti aruba mapang ka nung iba tejaokba ya Hombarnü agütsü. Trump-i iba rara ya tembangdaksütsü kanga meranga arur, koba pai küm ka tejakdang tir mapa agizüker ghonda 24 tsüngta anendaksütsü ta shia lir.

Trump mendenpuba sür "board of peace" nung amentsü asoshi White House-i alima nung tongtipang nisungtem jaoker.

"Iba board of peace nung adentsü asoshi Tir Putin-a jaok," ta Kremlin odongtar Dmitry Peskov-i osangbener dang Hombarnü ashi.

Washington-i iba maongka agütsüba nung aliba ajunga Russia-i jangjatsü meranger, ta pai ashi saka Putin tejangraba ali-mali mashi.

Putin tembar Belarus Tir Alexander Lukashenko-a iba telok nung adentsü Trump-i jaoka lir ta ashir.

Moscow-i küm aika Israel aser Palestine densema Middle East nung tongtipang linüktem den tesendaktep tajung ayutsü meranga aru.

Ajisüaka Israel-i küm ana dak tema Gaza nung rara

tenzükbä aser Russia-i 2022 küm February ita nungi Ukraine makyonga aruba sülen Putin ya Israel nungi pila ao aser Iran ama par tsükchir den tesendaktep yanglur.

Anüolen linük temi senzüka yutsüba mapang Moscow-i Gulf Arab linüktem den tesendaktep yanglutsü meranger.

Taoba mapanga Trump-i rara anendaksütsü merangba atema Putin-i tenüngsang agüja liasü.

"Item tepenja mepetmesü bentettsü asoshi pai kanga meranga inyaker," ta Putin-i October ita shia liasü.

"Donald Trump-i inyakba ajunga nung takok ngura, ibai otsüsütsü asütsü," ta Putin-i Middle East tensa athishia ashi.

Ukraine amakba aser Gaza nung rara aliba ajanga Moscow ya akhi mapang nungi Israel den tesendaktep tajung nung aliba raksa.

Kremlin-i aiben Israel-i Gaza nung raraba aitsü aser atsüanem akatsü ayongzüka arur.

"Gaza Strip nung nisung meimchiri maginüba timtem ajangshitar. Russia ya Palestine nunger tembar ama teti teyari agütsütsü meranger," ta Putin-i May ita Palestinian Authority Tir Mahmoud Abbas den senden ka amenba mapang shia liasü.

"Board of peace" yagi Gaza nung Israel indang rara tembangtsü asoshi Trump indang 20-point sentong mapa kuma inyaktsü imlar, kong US, Europe aser Arab linüktem densema alima tesem balala nungi teshimtet nübu aliba three-tier governing structure ka lir.

Canada, Venezuela aser Greenland ya US litsü ama map ka Trump-i lemsa

Washington, Aenjeti/January 20 (Agencies): US Tir Donald Trump-i Mongulbarnü United States of America indang map ka social media nung lemsatepba nung Canada, Venezuela aser Greenland ya US litsü nung shilem ka ama liasü.

Iba map ya AI ajanga yangluba mesüker, koba Trump-i pa indang Truth Social sapang nung lemsatep. Greenland agitsü meranga Europe nung par tembar tem den o agi raratepba mapang ka nung iba ya ataloker.

Minute ishika lir Trump-i ano noksa ka post sütsü, kong Vice President JD Vance aser Secretary of State Marco Rubio den külemi pai USA flag ka songa liasü aser "Greenland US Territory Est 2026" ta zülua liasü.

Taoba küm US tir akumba sülen Trump-i Canada ya USA indang state 51 buba akumtsü atema maongka agüja liasü. Ajisüaka Canada sorkari iba maongka magi aser iba sülen kidanger linük ana tsüngta shishilempaba tsütsü rara tesashi tenzü.

Ita tetenzüklen US special forces-i Venezuela nung operation agia Tir Nicolas Maduro aser pa kinungtsü Caracas nung apu aser

temesepba mozü shibelenba tai tonglokja aliba jembitsü asoshi New York-i anir ao. Iba sülen United States-i Venezuela ketdang asütsü aser US company temi yangji aliba totzü azüoktsü ta Trump-i jembia arur. Alima nung totzü timtiba Venezuela nung lir. Pai interim president Delcy Rodriguez dang Washington sülen anidaksü ashi aser aji mesüra timtem ajurutsü ta amokmeren.

USA-i "national security" atema ali rongsen jenti aliba Greenland ya nüngdaker ta Trump-i shijen shia arur, aser iba asetkong nung United States sepatem aliba tesem ka lir aser NATO tembar Denmark den security agreements zülutepa lir.

Hombarnü Trump-i yimjung kisüng atema bilemstsü menügdaker ta shia Greenland agitsü merangba tali asendenshir.

Norway indang ato kilonser den jembiba mapang Trump-i iba Arctic asetkong nung Denmark temeden kechi ali ta asüngdanga liasü, koba pai ajunga amokbangner ta shia lir.

"Rara 8 dak tema anendakjaka ner linüki kü nem Nobel Peace Prize magütsütsü telemtetba agiba bilemdanger ni yimjung kisüng atema

bilemstsü menügdak ta angateter," ta Trump-i Norway Ato Kilonser Jonas Gahr Store dangi zülü.

Pai Greenland alizüktsü sentong aliba nung anemer European allies tem dang tariffs tasen meshitsü amokmerena lir.

Japan PM Takaichi-i election jelia agitsü sangdongogo

Tokyo, Aenjeti/January 20 (Agencies): Japan Ato Kilonser Sanae Takaichi-i Hokulbarnü parliament shibangtsü aser February 8 nü election jelia agitsü atema lenmang lapoktsütsü, kong lai lower house nung menden timba angutsü teimla lir.

"Iba telemtetba ya agitsü kanga tasak liasü, koba ajanga nüburtem den külemi Japan tejakleni aotsü jangjatsü," ta Takaichi-i Tokyo nung osangbener senden ka nung ashi.

Iba linük nung ato kilonser tetsür mezüngbuba aser lar cabinet ya taoba küm October ita yimsüsüba mendeni aruba sülen nüburtemi kanga bhukuma nungiter.

Ajisüaka lar party ya polls nung tesülen lir aser tang election jelia agitsü mera agiba nung timtem ajurutsü akok.

Takaichi ya ozüng yanglurtemi October 21 nü ato kilonser ama shim aser tang

House of Representatives nung nüburtem nem shimdaksüner, koba Japan nung tashi tulutiba house lir.

Takaichi ya ato kilonser akumba anogo nungi lar cabinet ya election nung metendang, kong nüburtemi sorkar shimer, ta shijen shia aru.

"Sanae Takaichi ya ato kilonser inyaktsü temsüa lir na? Ni tashi tulutiba aliba nübur nem telemtetba agidaksüner," ta lai osangbener senden nung ashi.

Lower house nung MPs 465 shimtsü atema nübuyim ya January 27 nungi tenzüksü, aser parnok kümsük ya küm pezü lir.

Lar Liberal Democratic Party (LDP) yagi 1955 küm nungibo tanen makai Japan nung yimsü süa arur. House of Representatives nung LDP menden 199 lir aser yanghi independent partners asem dena lir. LDP ya Japan Innovation party den coalition nung lir, anungji sorkar kumteta

yimsü sütettsüsa tera agi menden timba agia lir.

Takaichi ya taoba ato kilonser Shinzo Abe-i shisalen sayua anitet aser Margaret Thatcher kanga sabur, aser la dang Japan indang "Iron Lady" ta ajar.

Lai rongsenketzüng temaba jenjangi ajungkettsü nangzüka ato kilonser akum.

December ita lar cabinet-i otsü yanglua defence budget nung sen yen trillion toku (\$57bn; £43bn) agizüka liasü. China mitkar inyaksangshi ya region nung tebilemstsü tulutiba ta züngshiba mapang ka nung iba budget ya renema liasü.

Taoba küm November ita nungi China-i Takaichi dang kanga mepelar, shibai China-i Taiwan makra Japan-i 'self-defence force' amshitsü ta shia liasü. Iba sülen linük ana tsüngta tesendaktep tamajungtiba tia nung lir.

Kasa mapang Takaichi ya US den tesendaktep tajungba yanglutsü meranger.

AFI Starters' Course nung NAA ketdangsür ana shilem agi



Dimapur, Aenjeti/January 20 (TYO): Nagaland Athletics Association (NAA) ajanga shimba ketdangsür ana - B. Bongshet Phom aser Tokuho Sumi - Athletics Federation of India (AFI)-i SAI Netaji Subhas National Institute of Sports (NSNIS), Patiala nung January 14-17, 2026 anogotem ayongzükba Starters' Course nung shilem agia liasü.

Iba course ya United Kingdom nungi Allan Bell lenisüba kübok agia liasü, shiba World Athletics Starters Panel nungi alimai kanga junga metetba Starter ka lir, aser pai

technical shisatsü sayu aser asaya nung yimya balala alima nung amshiba lemsatepa liasü.

Tokuho Sumi ya Athletics Federation of India kübok qualified Federation State Technical Official (FSTO) lir aser Bachelor of Physical Education degree bena lir aser tang Athletics Coach ka ama teinyakdak lir.

B. Bongshet Phom ya Athletics Federation of India kübok qualified District Technical Official (DTO) ka lir aser tang Physical Education Teacher inyaker.

Pa ya Physical education nung bachelor degree bena lira

ser NSNIS, Kolkata nungi Certificate in Athletics renemogo.

National aser international officiating standards den lirumetemsü aser athletics ketdangsür technical tashi itshitsü nükjidong nung iba Starters' Course ya ayongzük.

NAA ketdangsürtem iba sentong nung shilem agiba ya Nagaland nung technical officiating tajungba akumtsü asoshi tongtipang mera ka lir.

Athletics Federation of India ajanga iba ama maongka tajung agütsüba atema pelar, ta Nagaland Athletics Association sangdong ka ajanga ashi.

Novak Djokovic-i Australian Open nung otsü tasen yanglutet



Melbourne, Aenjeti/January 20 (Agencies): Novak Djokovic-i tennis puti otsü tasen yanglutsü lenmang tasen maneni angur.

Hombar aonung Australian Open nung arishi küm 38 tain Serbia nungbai Melbourne nung Spaine nung Pedro Martinez madak 6-3, 6-2, 6-2 agi takok ngua pa asoshi main-draw singlens 100 buba tongteta liasü.

Scoreboard nungbo ibai teti ama liasü, saka otsü kaket tem nungbo balaka lir.

Iba asaya nung takok anguba ajanga Open era nung Grand Slams balala asem nung

100 main-draw singles takok nguteter Djokovic kija akumer.

Wimbledon nung pai asaya 102 nung takok ngua lir aser Roland Garros nung 101 ben takok ngua lir. Nisung shingaia majors asem nung iba alizüng metongteti lir.

"Centurion ta asüba olaji ni aginer. Otsü yangluba ya ajungmeso tulu lir," ta Djokovic-i court nung menürema ashi.

Open era nung Grand Slam kija asaya main-draw 100 takok nguteter ya asayar pongu dang lir, aser itemji Roger Federer, Rafael Nadal, Serena Williams, Martina Navratilova aser Chris

Evert alitsü.

Khen dak tali iba alizüng tongteter ya Djokovic sülenbo Federer dang lir, shibai Wimbledon aser Australian Open nung tongteta lir. Asayamung tulu asem nung asaya 100 nung takok angurbo Djokovic kisüng lir.

Nadal-i Paris asayamung amokbanger asayaka Melbourne nung 77 ben dang takok ngua lir aser Wimbledon nung 58. Federer ya Roland Garros aser US Open nung century metongteti lir.

Djokovic ya New York nunga asaya 100 nung takok angutsü anasa lir - tang 95 ben koka lir.

Iba alizüng alema oa ano Djokovic ya otsü yanglua Grand Slam singles title 25 buba arishir. Pai 2023 küm US Open akokba sülen 24 nung lir aser taoba küm Melbourne nung tera agi monguteti lia semi-finals nung Alexander Zverev den asayadang yirur asaya anen.

Martinez den asayadang Djokovic sadem-sadema asayatet aser tang pa Italy nung Francesco Maestrelli den asayatsü lir.

Kü mapang tembangogo: Saina Nehwal

New Delhi, Aenjeti/January 20 (Agencies): London Olympics nung bronze medal angur Saina Nehwal-i la badminton asaya nungi anisüngzükba jangjatsüogo aser tang la temangi asaya nung meyarir, la temokok-i masayateter aser la küm ana tashi masayai arur aser la asaya nungi anisüngzükba ya mesangdongaka atangji lir ta ashi.

Nehwal ya tesüiba küm ana tashi badminton asayamung kata nunga shilem magi arur, aser la tesüsa asayaba ya 2023 Singapore Open nung liasü.

Pa asayamung nung mapang talangka shilem magi aruaka, Nehwal-i badminton asaya nungi anisüngzükba mesangdongi liasü.

"Ni küm ana tejaklen nungi asaya anenogo. Ni kü mulungba nung asaya tenzük aser kü mulungba nung yutsü ama bilemer, anungji asaya nungi anisüngzükba sangdongtsü nungdak meliasü. Nai masayatetera, aji ojang," ta Saina-i podcast ka nung jembidang ashi.

Nehwal-i iba telemtetba ya la temokok majungba ajanga

agitsüsa akum ta ashi, koba ajanga la training tesashi agitsü tamakoktsü kumdahtsü.

"Nü temokok nung cartilage kanga ajemer, nüdak arthritis lir, ibaji kü tsürabor, kü coaches temi metettsü nungdaka liasü aser ni parnok dang shiogo," ta Nehwal-i ashi.

Lai asaya nungi anisüngzükba balaka sangdongtsü nungdak majitet ta lai nenshia ashi aser la asayamung balala nung mapang talangka shilem magiba yagi sayur ta ashi.

"Meilongi nüburtemi Saina-i masayar ta angatettsü," ta Nehwal-i ashi. Olympic medal angulai la temokok agi training tebungba magiteter ta ashi.

"Ni asaya nungi anisüngzükba sangdongtsü ya mapa tuluka ama ni mebilem. Kü mapang tembangogo ta ni angatet, kechiaser ni masayateter, kü temokok akhi ama masü," ta Nehwal-i ashi.

"Alima nung tajungtiba asütsü atema nai ghonda ti nungi toku tashi training agir, tang kü temokok agi ghonda ka mesüra ana dang asayateter," ta Nehwal-i ashi.

India Open tamakok ajuruba sülen SAI dang tapet mera agitsü tuyu

New Delhi, Aenjeti/January 20 (Agencies): Taoba hopta India Open badminton asayamung nung bendang lima nungi arua asayar temi inyakyim aika nung ashishitepba sülen Sports Ministry-i ola adoka Sports Authority of India dang metongshitsü ashi. Sports Minister Mansukh Mandaviya-i SAI ketdangsürtem den Hombarnü ajurutepa liasü.

Osang ajanga ashiba agi, Mandaviya-i stadium administrators den senden ka amen, shirnok iba asayamung mapang maliba kanga jangja metet aser taoba hopta mepetmesü atema osang tejangja agütsütsü ashi.

Iba metokmeperi ya ajanga India atema nüburtem mulungjang nung tangatetba meshidak agütsür, koba 2036 nung Olympic ayongzüktsü linük mapang aliba nung tongtipang küm ka lir.

Delhi mopung majungba ya paidoktsü makok, saka ozü-i asayadak jana indokbam stands nung shingo ka aitba aser metzü meshiba tesem aser training areas densema ki o jen junga anepalu masüba mechi SAI kanga sashia asadanga liasü.

"Minister-i temulung agütsür aser SAI ajanga anogo ishika tsüngta metongshia mera agiba

osang tejangja agütsütsü," ta osang ka ajanga ashi.

Stadium anepalutsü mapa ya SAI nem nunglokja lir aser August ita Badminton World Championships ayongzüktsü aliba tesemtem nung mepetmesü ajuruba asoshi kanga parnok kanga sashia aitsü.

Denmark nungi badminton asayar Mia Blichfeldt-i mürekmeju maliba indang ashi aser komaser kasa tesem nung küm tom nung asayamung tulu ayongzüktsü ta asüngdanga liasü.

SAI ya national camps aser saisapong indang ki o jen ketdangsüba telok tulutiba lir, aser India Open mapang lenla ajak nung parnok metokmeperi liasü.

International shuttlers temi aitsüba Badminton Association of India-i ketdangsüa liasü, shirnoki iba asayamung tenzüktsü hopta ishika lia stadium ketdang asü tenzük.

"Tensa azüoktsü asoshi Deputy Director level officer nungdaka liasü, aser iba mesük SAI-i taoba küm Jawaharlal Nehru Stadium nung para-world championships mapang inyaka liasü, kong asayamung ayongzükba tsütsü junga inyaktet," ta osang ka ajanga ashi.

BILEMDANGANG

"Tashi angaba aser talenba maliba ajanga mapa tulu inyakteter."